

Käthe Kollwitz: Moder mit still Gedenken

(van Erhard Brüchert)

Wenn ik mol weer in Berlin bi mien Kinner up Visiet bün, denn mak ik faken mol de Gang van dat Brandenborger Tor, över de Prunkstraat „Unter den Linden“ bit na de Berliner Dom un dat neeje Humboldt-Museum an de Spree-Brügg. Bi dat stolte, uroolte Denkmol van Preußenkönig Friedrich „de Grote“ wessel ik gau dör all de Autos up de anner Siet, wieldat ik tägenöver de „Ehrenwache“ besöken will un mutt. Dor maak ik tominsten 20 Minuten Paus, ümdat ik mi in Roh un mit still Nadenken de berühmte Pietà-Bronze-Denkmol van Käthe Kollwitz ankieken kann: De truervull Moder mit hör dood Suldaten-Söhn up hör Schoot...



Un up ´n Mol sünd ok alle de fröhlike un krawallige Berlin-Touisten üm mi to heel still – se kieken ok stumm dör een swarte lisen-Gitter up disse berühmte Anti-Kriegs-Denkmol, de heel allennig in de Midde van de grote, hoge Pantheon-Halle steiht - upboot van Karl Friedrich Schinkel as „Neue Wache“ al in de Johren 1816-18.

De Bronze-Plastik in de grote, dämmerige Halle, wor nix anners insteiht as disse meterhoge Plastik, hett de berühmte Künstlerin Käthe Kollwitz in de Johren 1937/38 utbillt, also in de düsterste Tiet van Düütschland – in Truer un Gedenken an hör eegen Söhn Peter, de in de 1. Weltkrieg fullen is. Eerst na 1945 is dat Kunstwark dor in Berlin upstellt worrn – nu ok för die Doden in de 2. Weltkrieg. Käthe Kollwitz hett sülben doröver schreben, dat se bi de Arbeit an dit Wark alltiets stumm un still in deep Dadenken an hör Söhn Peter versunken weer, de al in de 1. Weltorlog as Suldat fullen is.

Vandag denk ik ok bi mien eegen Nadenken vör disse Ehrenmal an alle de Moders in de Ukraine un hör Söhns an de Front tägen Putins Angriepers ut Russland. Is man goot, dat all de Touristen up de Pracht-Boulevard „Ünner de Linnen“ an disse berühmte Kollwitz-Freedens-Plastik in Berlin elke Dag vörbilopen mutten... un sük dor ok ´n Moment besinnen doont...sogor an 365 Dage int Johr, wenn se willen... un besünners ok siet de 24. Februar 2022, as weer een Orlog in uns Tiet in ´n Oosten anfang.

(oostfreesk Platt)

Wöör-Verklaren:

- up Visiet = auf Besuch
- elke Dag = jeden Tag
- weer – wieder
- Orlog = Krieg